

تاریخ عثمانی انجمنی

مجموعہ سی

ایک آیدہ برنشر اولنور

مندرجات

طوبیہو سرای ہاپونی	عبدالرحمن شرف
صدر اعظم سعید محمد پاشا سر حومک استقبولہ وقوع	یا تقو اسکندر حوجی
بولان سفارتندن عودتندہ مقام صدارتہ تقدم	
ایلدیکی تقریر	
برعثمانلی فیلوسنک صوماطرہ سفری (مابعد)	صفوت
علمدار مصطفی پاشا (مابعد)	افضل الدین
قرہ مان اوغللری حقندہ وثائق محکوکہ	خلیل ادہم
تفرقہ : تاریخ سلطان محمد ثانی . مؤلفی قرینو وولوس . مترجمی قارولیدی .	

فیثائی ۵ غروش

مترجمی — باب عالی تاریخ عثمانی انجمنی

استانبول

تاریخ عثمانی انجمنی

طبع حقیق مشائیر شرق

۱۳۲۹

صدر اعظم سعيد محمد پاشا مرحومك خواجهكان ديوان همايوندن ايكن استوقهوله وقوعبولان سفارتي

مجموعه مزك بونسخه سنه درجي تصويب اولتان سفارتنامه نك صاحبي
۱۱۴۲ تاريخنده صنعت طباعتي مهتدي ابراهيم افندي ايله برابر در سعادتده
احداث و سلطان عثمان خان ثالث دور سلطنتده ۱۱۶۹ سنه سنده آلتی
آيه قریب مقام صدر تعظیابی احراز ایدن سید محمد پاشا در که یکر می
سکز چلی دینلمکه شهرت شعار دفتر دار محمد افندی نجل نجیبدر. شارالیه
سید پاشا پدرینک ۱۱۳۳ سنه سنده پارسه وقوعبولان سفارتي اثناده
آکارفاقت ایلدیکی کبی ۱۱۴۵ سنه سنده کنیدی استوقهوله و ۱۱۵۴
سنه سنده پارسه سفارته کتیدی. مشارالیهک بویکی سفارت فوق العاده سی
عقینده قلمه آلوب تقدیم ایلدیکی تقریرلرک هیچ برینه شمدی به قدر
در سعادت کتبخانه لرنده تصادف اولنه ماش ایکن استوقهوله متعلق
سفارتنامه سی کچلورده برترکه دن الده ایتدیکم بر مجموعۀ تاریخیده
بولنمشدر. بوسفارتنامه یالکز ندرتندن دکل، مشارالیهک کرک
عزیمت وعودتی و کرک اسوج پایتختده اقامتی اثناسنده کی مشهوداتندن
وتاریخ لرمزده «دمیر باش» دیمکه معروف واوروپا محافلنده مشهور
اولان اسوج قرالی اون ایکنجی شارله دولت علیه طرفندن اقراض
صورتیله اعطا اولتان مبالغ و فیره ایچون وقعه نویس راشد افندی
تاریخنده بولنیمان برطاقم معلوماتدن دخی باحث اولغله اهمیت عظیمه یی
حاضردر. پاشای مشارالیهک استوقهوله اولان سفارترینک اسبابنه کلنجه
ظاهراً کرچه اقراض اولتان مارالذکر مبالغ ایچون اعزام اولدینی
کوریلور ایسه ده حقیقت حال روسیه ایله اسوج آراسنده براتفاق عقد

اولدینی و « اسوجلونك روسیه به تبعیتی » شایع اولش اولدیندن بونی تدقیق و تحقیق ایلك اوزره کوندرلدیکی صدراعظم حکیم اوغلی علی پاشا طرفدن عتبه شاهانه به تقدیم اولنوب مارالذکر مجموعه ده مندرج اولان و برصورتی آتی به درج ایدیلان عریضه دن مستبان اولمقده در:

« اسوجلو خصوصی چون شرفیافته صدور اولان خط هایون »
 « شوکت مقرولاری منطوقی معلوم چا کرانه م اولدی نفس الامر ملاحظه »
 « هایون جهانداریلری عین کرامتدر لکن اسوجلونك ضنف حالی »
 « و مقولوا یله اتفاقی و تبعیتی بوندن مقدم مسموع چا کرانه م اولوب اولوقت »
 « بومثللو بر ملاحظه اولمقده یندن تحقیق و تدقیقه چندان وقت اولماشیدی »
 « بودفعه شرفریز صدور اولان امر هایونلرینه بناءً اسوجلو مقولوا یله »
 « متفق و مقولویه تبعیتی واقعی در دکلیدر حقیقتی ارباب و قوفدن استخبار »
 « و استکناه و صحتی نه وجهله ایبه رکاب هایونلرینه بمدالعرض اقتضای اوزره »
 « اسوجلونك طرفدن اولان ایلیجیسی ایله مذاکره و مکالمه نه مباشرت »
 « اولنور و اسوجلونك دولت علیه نه مقدار دیوناتی اولدینی بوندن اقدام »
 « محاسبه دن درکنار ایتدی رلد کده ایکیوزاللی بیک غروش دینلری اولدینی »
 « درکناردن مستبان اولمقده درکنار اولنان کاغد عتبه علیه ملوکانه لرینه »
 « عرض اولندی . »

سفارتنامه نك مندرجاته نظر آسید محمد پاشانك استانبولدن حرکتی

۱۱۴۵ سنه سی جمادی الاولینك اون سکزینه [۲۶ تشرین اول ۱۷۳۲]

و عودتی ۱۱۴۶ سنه سی ربیع الاخرینك اون سکزینه [۲۸ ایلول ۱۷۳۳]

تصادف ایلیور شوخالده پاشای مشار الیهک در سعادتدن مدت غیوبتی ۳۲۷ کون و اسوجده اقامتی کندی افاده سنه نظر آ اوچ آی اون کون امتداد ایلمشدر . مشار الیهک عزیمتی قیسه تصادف ایلدیکندن استوقهوله انجیق یوزاللی طقوز کونده کیده بیلش و اورادن استانبوله التمش یدی کونده عودت ایلمشدر .

ی . ا . هوجی

مشارالیهك عودتنده مقام صدارتعضمايه

تقدیم ایلدیکی تقریر

بیک یوز قرق بش سنه سی جمادی الاولینک اون سکزنجی کونی طرف دولت علیه دن اسوج طرفنه عزیمت و موافق هوا ایله چنکه بالقانی مرور اولنوب شنی قصبه نه دخولزده دفه شتا ظهور ایدوب کتدیجه مشد اوله رق درت ساعت ظرفده ایکی قاریش مقداری قار تراکم ایدوب یوللرده عظیم صموبت ظهور ایتمکله هر نه حال ایسه افتان وخیزان نهر طونه بی عبور ایدوب یرکوکی قلعه نه نزول و ایرتسی کون یوللرده کثرت برفدن را کباً عزیمت ممکن اولمانله کرك قوللری و کرك معیتزده بولنان اتباع قوللری بالجله احوال و اتقالتز ایله اول ائساده افلاق و یوده سی اولان اسکرلت زاده قسطنطین و یوده قوللری طرفدن احضار اولنان قیزاقره سوار اولوب قصبه بکرشه بر ساعت مقداری تقرب اولندقده و یوده سفور قوللری نامه هایونی استقبال اینجون تعیه ایلدیکی درتیوز مقداری سواری و جمیع قبوسی خلقی و کتخداسی مهترخانه ایله نامه هایون شوکت مقرونی عظیم احترام و سرور ایله استقبال ایدوب آلائی ایله شهره نزول و برقاج کون شدت هوایه سکون کلور ملاحظه سیله مکث اولنوب لکن ملالت هوادن آیاس صورتلری نمایان اولمقله متوکلاً علی الله الکریم اسلوب سابق اوزره ینه مرتب اولان آلائی و مهترخانه ایله نامه هایون شوکت مقرون تشییع اولنوب جانب بغداده عزیمت و اول کون کیدیلوب کیجه سی تکرار افراط اوزره قاریاغمله بروجهله طشره چیقمنه امکان اولیوب اوچکون اوچ کیجه رعایا خانه سی بوخاغنده حیوانات آراسنده مکث اولنوب هله هر نه حال ایسه اوچنجی کون بر مقدار هوا

ساکن اولوب یوله عزیمت و «بوزآ» نام محله واردیفمزده معیتمزده اولان بعض یولچیلردن برتاتار و برذمی شدت برودت هوادن منجمد اولوب هلاک اولدیله حاصلی اول حال ایله بغدادن بلادندن «پورلات» نام قصبه واریلوب ایرتسی کون یوللردن کچلمک ممکن اولدیغی خبر آلدند قده عزیمت اولنوب سکنز ساعت مسافده واقع «واسلوی» نام محله وارلق ایچون یدی ساعت مقداری یورینوب نخبیناً بر ساعت مقداری یول قالدقده قارلمغه باشلیوب اولمرتبه افراط نزول ایلدی که برقاچ دقیقه ایچنده یوللر مسدود و چیغیرلر غائب اولوب اخشام دخی اولمغه حیران سرکردان اولوب کریمه زار ایله جناب رب العالمین حضرتلرندن استعانت اولنوب اول ائشاده برتاتارک ایاقلری منجمد اولمغه تلاشندن بیچاره نه ایدیه جکئی بیله میوب همان سوار اولدیغی دابه سنک قارتی یاروب ایاقلری ایصمق ملاحظه سیله ایچنه صوقدقده در حال تاتار ودابه منجمد اولوب ایکیسی دخی هلاک اولدیله لکن عون حق ایله بزدن کسنه یه ضرر اولیوب فقط برینک بر مقدار قولاغی آزرده اولدی صکره علاج اولنوب الحمدلله اولدخی خلاص بولدی حاصل کلام بووجه اوزره هزار محنت و مشقت ایله بر ساعتک یول طقوز ساعتده آلتوب قصبه واسلوی یه نزول میسر و اوج کون مکث اولنوب سکنزنجی قوناقده سرخوتینه وصوله میسر اولدقده قانون اوزره محافظی الیاس پاشا قوللرینک مکمل قیوسی خلقی و کتخداسی و مهترخانه سیله اوچیوز مقداری سواری نامه هایونی استقبال و آلائی ایله قلمه یه واریلوب عظیم طوب شلکلری اولندقدن صکره لهلودن دخولزه اذن خبری کلنجه یکریمی التی کون خوتینده الیاس پاشا خانه سنده مکث اولنوب اذن خبری کلدکده شعبان شریفک یکریمی التی کونی ایکی طرفدن دخی عظیم آلائی و طوب شلکلری اوله رق محافظ الیاس پاشا قوللری و کتخداسی و ساطتیه بو قوللری لهلویه تسلیم اولنوب ایکی طرفک عکری محللرینه عودت ایتدکده

قوللری مرمز اولان « ایتروانجه » ده اولکیجه مکث و ابرتسی یه قیزاقلره سوار اولنوب « وارشوه » طرفه عزیمت و یهود خانہ لرینه قونارق خصوصاً نماز قیلہ جق بر پاک محل و آبدست ایچون شہسز پاک صوتدارکنده غایبہ الغایہ مشقت چکیلہ رک بکرمی ا ج قوناقده لہلونک مقرحکومتی اولان « وارشوه » قلعہ سنہ وصول میسر اولوب لکن وصولزدن اول له قرالی اولان « نعل قران » دیدکلری دشمن بی دین مرد اولمش بولمغله الحمد لله تعالی روی بدبوخی مشاہدہ میسر اولیوب قرال وکیلی اولان « یری » نام کسنہ یه واریلوب مکتوبلریمز تسلیم و حضار مجلس مواجہہ سنده درحال فتح و قرائت ایدوب مفہوملری معلوم اولدقده طرفزہ خطاب ایدوب « بزر دولت علیہ نک صادق دوستی و مأمون القائلہ قوکتیلر اولوب ہر وجہلہ دولت علیہ نک حسن حایتین امیدایدر طائفہ اولماض ایلہ بہر حال دولت علیہ نک رضاسی مطلوبیمز اولوب بودفعہ سزک سفارتکنز ایچون سہولت طریقکترہ ماعده و التزام ایدہ رز . بر قاچ کون مکث ایدک سزی قریباً محل مأمورہ کترہ ارسال ایدہ رز، دیوب وارشوه کنارندن جریان ایدن « دیلا » نہری اوزرہ ایکی قطعہ بوروزان تعبیر اولنور قایقلر اوزرہ قوللری ایچون اوجاقلو اوطلر یایدیروب و ایچنہ چوقہ قاپلادوب راحت ایلہ مزبور قایقلرہ سوار و دیلا صوبی ایلہ اون برکوندہ « دانقہ » قلعہ سنہ نزول اولنوب التی کون مکث ایچندہ ینہ لہلو طرفندن تہیہ قلناسن ایکی قطعہ صغیر قالیونلرہ سوار و بحر بالطقک بوزلری دخی چوزیلوب یول آچلمق ایچون شدت ہوا یه باقلمایوب متوکلاً علی اللہ تعالی « انکینہ » عزیمت و سکزنجی کوندہ اسوج کنارلرینہ واریلشیکن تجری الریاح بمالاتشہی مدلولتجہ باد مخالف وزان اولوب تکرار انکینہ عودت وینہ کنارہ کنبوب ایچری کیرلمک اوزرہ ایکن ینہ کیرویہ عودت حاصلی اوج دفعہ کنارہ کنبوب عودت واقع اولوب اوچنجی دفعہ دہ ہوا زیادہ

مشد اولوب بروجله برطرفده مكث و آرام ممكن اولمافله روزكارك اوكنه دوشوب نوروجیا قریبده واقع « قوتلاند » جزیره سنه واریلوب درت بچق کون آنده مكث و ذخیره من دخی تمام اولوب جزیره ده ایسه قوری بالقدن غیري چندان ما کولات بولنمافله هر نه حال ایسه تمیش اولنوب بشنجی کون ماعد کورنمکله ینه صوب مقصوده عزیمت اولنوب ایکی کونده اسوج یقنه وصول و « لانسورت » بوغازندن ایچرو دخول میسر اولدقده جمله من مسرورا حمد و شکر ایدره ك خرده آطه لر آرمسندن طولانه رق بش کونده اسوجك مقرحکومتی اولان « استقہولم » شهرینه تقرب اولندی لکن سفر دریانك کیفیت حالی شویله ایدی که بالطق دکزی غایت صفوق و فورطنه سی شدید دکز اولوب اخشامدن یلکنلر نه طرفه چکیلمش ایسه کیجه اوله طوکوب ایرته سی اوکله وقتنه دک برطرفه دخی دوندرمك ممکن اوله من ایدی اوله ملاحظه اولنور که خلاطار و مقاره اوزرنده یاصدق قدر بوزلر طوکوب کیجیلر تخری بالطه لر ایله چیقوب برقاج ساعتده کوچ ایله بوزلری قطع ایدوب دریایه دوکرلر ایدی واقلم شهر دخی زیاده برودت اوزره اولمفله سنه ده بریچق آی مقداری مستدل هوا آنچق کوریلوب ماعدا جمله برودت اوزره مرور ایله در حتی اکیلرینك ظهور و حصادی جمله قرق کونه منحصر اولمفله اکین نارلاده قوروپوب خرمن اوله مدینسندن هر کوبده مخصوص بقدای قورتمق ایچون فورونلر ایجاد ایدوب آنده قورودورلر حتی حزررانك اون برنجی کونی ایدی دفعه شویله برعظیم قاریاغدیکه نصف ساعتده برقارش مقداری اولدی و درعقب هوا کشاده اولمفله چوق طورمیوب محو اولدی حاصلی یاز کلور دیرلر ایدی لکن بو قوللری تموزك آخرینه قدر آنده مكث ایلم مدت مکشزده یاز هوای دیمکه شایسته برکون کورمدك بیلم بزدن صکره یاز کلدیمی الله تعالی ییلور چونکه قوللری اوچ دفعه اسوج ساحلنه کلوب وینه کیرویه عودت

و برقاج کون « قوتلاندا » جزیرہ سندھ مکشزدن اسوجلو تلف اولدیلر دیو وسوسه به دوشوب اطراف واکناه آدملر کوندروب احوالمزدن خبر آلق صددنده ایکن دفعتاً ورودمز واقع اولدقده مال بولش مغربی به دونوب درحال اسکله باشنده عظیم آلی ترتیب ونی قالیوندن آلق ایچون مخصوص کندی ضدالنی ارسال وراس اسکله به دخی آلی بارکیولی هنطوین آماده واحضار وقیوجیلر کتخداسنی برقاج قیوجی باشی ایله معاً استقبال قدوم نامه همایون شوکت مقرون ایتمکله اسکله به یناشدقده درحال مسفورلر اولدیقمز صنداله کلوب قرال وجمهور طرفدن سلام وتبریک قدوم ووصولزدن نه مرتبه مسرور اولدقلرین اعلام ایدوب جنابکیزی حاضر اولان خانه کزه کتورمک ایچون آلی سزه انتظارده اولغله بیورک کیده لم دیوب بندخی ضدالدين چيقوب اسوج طور اغنه آياق باصدقده بسم الله الرحمن الرحيم اودعت فيك ايها الارض شهادتي ان لا اله الا الله وال محمداً عبده وسوله فاشهدى في يوم القيمة ديوب معيت بنده لرنده بولنانلری دخی اشهاد ایتدکدنصکره قرالك هنطوینه سوار اولوب آلی ایله خانه معینه مز طرفه عزیزیت واثنای مرورمزده مزاحمه ناس شول مرتبه ده ایدیکه یول اوزرنده اولان خانه ودکانلر ودام اوزرلری مالا مال اولدیقندن غیرى اسکله ده موجود اولان قالیونلرینک ایپلرینه وارنجیه دیزلوب کویا هر بر خلاط کثرت ناسدن حوزه اوزومنه مشابه اولشدی کرک دیزیلان عسکر وکرک سیرجی نامنه اولان کسه لر بزلی کوردکده جمله سی سابقه لرینی هوایه صاللابوب بر آغزندن جمله سی لسانلرنجه الله تعالی آل عمال پادشاهنه عمرلر ویرسون دیو فریاد ایلیوب بو قدر طبل و بوقدر ترامپه ته تعمیر اولتور بورولر بردن چالئوب و آلتمش قدر طویلره برقتیلدن آتش ویرلدهکده ولوله سی آسمانه چیقوب بویله اکرام واحترام ایله خانه مزه نزول اولندقده درحال قرالك کتخداسی اولان « مارشالده لافور » نام کسه تکرار قرال وقرالیچه طرفدن سلام وتبریک قدوم ایلدی

والحاصل اخشام طعامی ایچون قرال کندی طاقیلہ برسفرہ مکمل طعام ارسال و « بیلورز اهل اسلام بزم طعامیزی یجزلر لکن بزبو طعامی مخصوص جدید قابل تدارک ایدوب اهتمام ایلدک » دیمش خوش ایمدی بو قوللری دخی حاضر اولان طعامه اوطوروب شکرله مقوله سندن برقاچ لقمه تناول وبعده قهوه لر ایچیلوب « قرالکزک اگر اماندن حظ ایلدک دوستلغه لایق اولان وجهله حرکت ایلدیلر طرفزدن عرض مودت ایله سزان شالله تعالی بز دخی برایی کون ایچنده اموریمزه نظام ویردیکمز کبی کندولرله کوریشورز » دهرک وداع اولندی . اگرچه بو قوللری کوردمم لکن المهدة علی الراوی قرال تبدیل قیافت اولجلسده موجود ایدی دیرلر لکن احتمالدر چونکه مجلس بویله بر خوشبجه مرور ایلدی بونک صوکی دخی بر خوشبجه اولق ملاحظه اولغمله برقاچ کوندن صوکره نامه هایون شوکت مقرونی تسلیم ایچون قرال طرفندن دعوت اولغمله ینه اولکی آلی کبی آلی ایله قرال سراینه واریلوب زردبان باشنده قوجیلر کتخداسی استقبال و دیوانخانه قیوسنده قرال کتخداسی استقبال ایدوب بلا توقف ایکنجی دیوانخانه به کیرلدکده قرالک اولدینی اوطه نیک قیوسی آچیلوب طوغریجه ایچرو کیرلدکده قرال کندو برکییر آینه نیک اوکنده قیام اوزره وایکی طرفه رجال دولتی قات اندرقات دیزیلوب برالنده برصغیر مجوهر عصا و برالنده دخی شابقسی بو قوللرینه طوغری تبسم ایدرهک درت آدیم مقداری یورو یوب توقف ایلدکده بو قوللری بلند آواز ایله شوکتلو کرامتلو مهابتلو خلیفه اسلام و ولی التم خاص و عام افندیمز حضرتلرینک عم امجدلری خداوندکار سابق حضرتلری زمان سعادت اقرارلرنده حاصل اولان دوستلغک محافظه سینه رغبت ایله بو قوللرین ارسال و نامه هایون شوکت مقرون ایله قرال دوستلرین مطیب البال بیوردقلرین ادا و تفهیم ایلدیکده قرال بالنفس کندو صاغ ایله نامه هایونی آلوب و برقاچ آدیم کیرویه کیدوب کندو ایله برسم

طبلہ اوزرینہ وضع ایلدکن سوکرہ تکرار کیرو دونوب یانمزہ کلدکدم
 اولدخی طرفدن عظم تشکرایدوب شوکتلو کرامتلو افندیمز حضرتلرینہ
 ثنا ایدوب نہ مرتبہ سرور اولدینغ عرض ایلدکدم آیین اهل اوزرہ
 وداع ایدوب طشرہ چیقلاقدہ عقیمزدن کتخداسنی ارسال ایدوب
 کندونک کوچک اوطنہ سندہ یوقوللرینہ قہوہ ویروب تنفس اولنمق
 اوزرہ تنبیہ ایتمکله مارشال اوکمزہ دوشوب اوطنہ کیرلکدم درعقب
 عجلہ اوزرہ قہوہ ویریلوب فنجان تمام ایدر ایتمز اولدینمز محلده
 بر آخر قبودن قرال کله دوشدکدم فنجانلر براغیلوب قرال طرفہ
 توجہ اولندقدہ طوغری قوللرینک یانہ کلوب والمدن یاپشوب
 تکرار بتکرار حال خاطر سؤالی ویول زحمتلرلہ نیجہسز دیہرک
 صحتہ آغاز وشوکتلو عظمتلو افدیکز آل عثمان پادشاہی حضرتلری نہ ایلہ
 مشغولدرلر ایشدک عجم طائفہسی نقض عہد ایدوب خلاف مأمول بعض
 ناسزا امورہ تصدی ایتمش دیدی وقوللری اگرچہ بوکیفیتک وقوعی
 وارد لکن بو خصوصہ عجم آرسنہ مفد قاریشوب طہماسب قولی
 نامندہ بر خائن وحیلہ کار حریف ظہور زور بازوسی ایلہ اعتماد الدولہک
 دعوا ایدوب بعض مرتبہ بی حیالق وحدنا شناسلق ایتمکہ جارت ایتمشدی
 لکن بو خصوصہ طرف دولت علیہدن اقتضایی اوزرہ تدارکی کورملک
 اوزرہ ایدی انشاء اللہ تعالی امیددرکہ شمدی یہ قدر قیدی کورلمش
 دیدیکمدہ انشاء اللہ مؤدہسنی سزدن ایشیدریز دیدی او اشنادہ قرال
 کتخداسی ایچرو کیروب طعام حاضردر دیدکدم قرال بنی طعامہ دعوت
 ایدوب ہیچ بر ایلمچی یہ واقع اولمش دکل ایکن شوکتلو افندمن حضرتلرینہ
 احتراماً بنی یانہ او طوردوب طعام تمامہ دک بدنغیری کسنہ ایلہ
 صحبت واقع اولدی حتی اثنای صحبتدہ لطیفہ طریقہ بکا خطاب ایدوب
 چونکہ دولت علیہ نک عجم ایلہ جنکی اولوب عجیا بکرمی اوتوز بیک
 عکرایلہ امداد ایچون وارسق شوکتلو افدیکز نہ بیورلرایدی دیدکدم

شوكتلو مهابتو افديمز حضرتلری زياده حظ ايدوب سزله عظيم لطف واکرام بيوررلر ايدى لکن معلومکزدرکه دولت عليه شمدي به کلتجه واقع اولان جنک کرده قطعاً کسه نك اعانتته محتاج اوليوب نه ايسه فتح وظفرلر من يالکزجه کندو قليجمز ايله حاصل اوله کلمکه سزدوستلر منک مالا ووجوداً زحمته کيرمه لرينه حاجت يوقدر همان بوراجقده کوکل يارديمي ايلديککوز کافيدر ديو جواب ويرلدکده اطرافده اولان وکلانسه اصول ايله اشارت ايدوب بوجوابکدن حظ ايلدم کوزل ديدک ديو صورت تحمين اظهار ايلدي وسوق کلام ايله خبره جي باشي احمد بک قوللرينک احوالندن سؤال ايدوب دولت عليه خدمته موفق اولديقتدن زياده حظ ايلدم کندو ايله رفاقتمز چوقدر بر زمان جنک کرده رفيعم ايدى شويله بر آدمدر اويله بر آدمدر نتیجه بتون فرنکستان ده نظيري ايکي به اوچه چيقماز بر استاد کاملدر جنک خصوصنده نظيري يوقدر ديو مدح وثناسنده مبالغه ايلدي واقعا کرک لهده وکرک اسوجده قتي وافر کمنه لر حقنده حسن شهادت ايدوب کالندن بحث ودولت عليه نك وقتيله ايشينه يارار بر آدمدر بولايکه اعتبار ايدلر ايدى ديديلر حاصلی بومقوله محبتلريله طعام تمام اولوب اسلوب سابق اوزره يته خانه مزه واريلوب ايرته سي کون قولکزدن بر آغیر دونامش وايکي يلمکندست اسب قراله وبردی قيمت بونجه دخی قراليجه به تقديم اولنوب بر قاج کونندن سوکره مکتوب صدر عالی بي تسليم ايچون باش وکيله واريلوب اولدخی قبودن استقبال ايلدي وفوق المأمول اکرام واحترام ايله مکتوب عالی بي تسليم ومفهومنه اطلاعندن صکره جوابي ویرلک وعد اولغمله چوقلق مکث اولغيموب خانه مزه عودت اولندی بوندن صکره برايکي هفته جواب صدورينه منتظر اولوب بر اثر ظهور ایتامکله همان باش وکیل خانه نه واريلوب کندودن صاحب دولت افديمز حضرتلرينک مکتوبلريني فهم ايلديکزمی جوابکز نه در ديو سؤال اولندقده او قودق آکلادق ان شاء الله طرف دولتندن رجعتکرده جوابي تحریر اولنور ديدکده

خیر بز بو طرفدہ سزدن بالشافہہ جواب آلدقجہ رجستمز واقع اولہ من
ہان نہ ایسہ بر مذا کرہ ایدہ لم دیدیکمدہ اعتنارہ آغاز ایدوب ایشلرینک
کثرتی و بو قوللرینک مکالمہ یہ صراحۃً مأموریتیم اولدینقی مثللو بعض واهی
عذرلر بیان ایتمکله قوللری دولت علیہ ناک رسم و عادتلرین و صراحۃً
مأموریت اقتضا ایتمدوکن تقرر و تفہیم و بعض کمنہ لری توسط ایتمکله
ہلہ بر مجلس مکالمہ یہ رضادادہ اولوب وقتی کندو اختیار ایدہ جک اولدی
بر قاچ کون مرورندن سو کرہ بر کون دفعۃً خبر کلوب جمہور سزکله
مکالمہ یہ منتظر در بیورک دیدیلر بو قوللری دخی در عقب باش وکیل خانہ سنہ
واروب واقعا رجال جمہور دن آلتی تفر کمنہ اولدہ جمع اولشلر باش
وکیل دخی آندہ اولغلہ گیریلوب حال و خاطر سؤال اولدقد نصکرہ مکالمہ یہ
آغاز اولنوب باش وکیل بو قوللرینہ خطاب ایدوب سؤالکز نہ در بیورک
زیرا بو رجال جمہور مخصوص جابکزک صحبتلریلہ مشرف اولمق ایچون
جمع اولدیلر دیدکدہ سئوالمز صاحب دولت افندیمزک مکتوبلرینقی فہم
ایلدیکرمی جوا بکز ندر دیو جوا بی کندولرہ صرف ایلدیکمدہ صاحب
دولت حضر تلرینک مکتوبلرینقی فہم ایلدک و اولوجہلہ عرض مودت
بیوردقلرندن زیادہ مسرور اولوب حظ ایلدک یادین خصوصہ دائرہ بعض
تحریرات یوقمی ایدی دیدکدہ بعض اشارت واردر لکن بزم کیفیتمز
مملومکز اولمق کرکک زیرا بوندن اقدام طرف دولتدن ارسال بیوریلان
قوز بکچی مصطفی اغا ایلہ احوالمز اعلام اولنشدیدی بزم اکثر محمولدار
ولایتلریمز مقبولوبہ گرفتار اولغلہ آلان الیمزده اولان اراضی ییاصلدر
الحالہ ہذہ ادای دین ایتمک دکل اقتضا ایدن مصارف ضرور بہ منزی وقایہ
ایدہ جک ایرادمنز یوقدر خصوصاً کہ جوانب اربعمن دشندر شمدیکی
حالہ بزم سعیمز کندیمیزی دشمندن قورتارمغہ بر مکننت تحصیلدر دیہرک
بو مثللو وافر کفت و کو استرحام صورتلی کلمات تقرر ایدوب ایشہ یارار
برسوز اولمانغلہ خوش بوسوز لر مانع دکل لکن بواجقہ استقراض اولنہ لی

یگرمی بش سنهیه قریب وقت مرور ایلدی اول زماندنبرو سنوی یگرمی
 بشر کیسه دین ادا ایتسه کز شمدی به دك بو ایش بر طرف اولور ایدی
 اگرچه خزینه خصوصده بر مقدار مضایقه کز وار ایسه ادا خصوصه
 همتده قصور کز اولش زیرا بویله اطرافلیجه دولتدن دین ایچون سنوی
 بر مقدار آچه افزای برایش دکل ایدوکی ظاهر در زیرا طرف کز اولان
 کرملری اگر بخاطر دن چیقماق لازم کله همه حال سز بوکا بر نظام وریر
 ایدیکز دیدیکمده حاشا بز دولت علیه نك کرم و نعمتن فراموش ایدنلردن
 دکلز و سز لر دخی بو مضایقه اثناسنده تشریف کز دن ممنون اولدق که احوالز
 معلوم کز اولدق دن صکره بلکه دولت علیه دن بزه بر مقدار خر جلق
 آلیور مکه سبب اولقله دولتک نعمتی اوزریمزه تجدید ایدر سز دیدی قوللری
 دخی نه شبهه اگر ذکر ایلیک کز و نقل ایلیکیم اوزره بو آچه بی تدریجی ادا
 ایتمش اولدیکز شمدی افندیلریمز دن هر نه القاس ایتسه کز حصولی بو حقیر
 در عهده ایدر ایدم لکن نه یوز ایله رجا ایدیم سز انصاف ایدک دیدیکمده باش
 وکیل سوز بوله میوب اگرچه قرالمز بو آچه بی استدانه ایتشدی لکن بندر
 وقعه سنده مبلغ مرقومی عثمانلی یقما ایلیک کندن ماعدا بز م فی الاصل ولایتزدن
 کتوردیکمز اشیامز دخی غارت زده اولوب سزک کف امان کززه التجا
 ایتمش بر آلی عاجز و بی گناه آدملر ایکن بز سیر ایتدیکز دیدکده
 قوللری دخی اولا چونکه بندر وقعه سنی ذکر ایتدیکز اقتضا ایلیکی
 اول خصوصده دولت علیه نك سر مودخلی اولیوب قصیراتینه طرف کز دن
 اولوب کندوکب یدیکز اولدیقنی سزه تفهیم ایدم اولا دولت علیه
 سزی امانته قبول و فوق الامکان اکرام و احترام کزده قصور ایتکسزین
 قرالکزی ولایتنه کوندرمک ایچون قرق بیک قدر عسکر ترتیب و مخصوص
 وزرای عظامدن بر قاج وزیر و سر عسکر تعیین ایدوب بو قدر عسکر
 حرکت کززه انتظار ایله بندر آتنده قشلا یوب دنیا قدر زحمت و مشقت
 چکد کد نصکره متوفی قرال مسقو قرالی بالطه جی محمد پاشا مرحوم نیچون

طوطوب الیہ ویرمدی دیو اولکی قولندن نکول و تکرار مقولو ایله صلحی بوزوب اجزای اغراض نغانہ صدینہ دوشدیکئی آشکارہ یہ چیققدہ کندم دخی انکار ایده میوب بو عناد اوزره مصر اولدقدہ شریعت مطہرہدہ ایله بلا سبب کمنہ ایله نقض عهد ایتمک خلاف شرع شریف اولوب شوکتلو کراملو خلیفہ اسلام افندیتمز حضرتلری اولوقدہ چونکہ قرال ولایتہ کیتیمک ایستیمور باری بندرسرحد ندندہ بولنق ایله فسخ صلحہ باعث اولماق ایچون اوتہ دن برو ویریلہ کلن تعینات ینہ ویرلسون کلوب جوار دولت علیہدہ مناسب محلہ ایستدیکئی قدر مکث ایلسون دیو بیورمشلر ایکن بو خصوص کندویہ اوج درت آی ایچندہ مره بعداخری تفہیم اولنیشیکن حتی عدم قبول ایله اصرار ایلدکده ناچار کندوی سرحددن تبعید اقتضا ایتمکله کویا کندی سی ایدوب بو حالتک وقوعنه باعث اولدی قالدیکه دین خصوصی بو آچہ سزه ویرلدکده مراد ایستدیکمز محلہ صرفه موفق اولورایسک ادا ایدهرز والا بر طریق ایله ضایع اولورسه ادا ایتمرز دیو بر قول ایستدیکزمی یوقه علی الاطلاق دین آلوب بلاریخ قرض شرعی اولوق اوزره می آلدیکمز و بومذکور ی ایراددن مقصود دینمز یوقدر دیمکی مراد نه در یوقه برغیری ملاحظه ضمنندہ می سوبلدیکمز دیدیکمده بز دینی انکار ایتمرز لکن شویله بر عنذر قارشمش منادر تحصیل خصوصندہ عجلہ اولنق لایق دکدر خصوصاً بزم دولتمز جمهور اولوب حل و عقد امور مستقلاً بر آدمک النده اولیوب جمیع ناسک اتقاقه محتاج بر کیفیت اولغله قانونمز اوزره اوج سنہدہ بردفعه جمعیت کبری اولوب دولتمزک ایراد و مصرفی محاسبی وسائر جمیع ناسک مواجبه و اتقاقیلہ اولغله ان شاء الله تعالی بر یحقی سنہدن سوکره اوله جق جمعیتزده بو خصوصی مذاکره و خلقک رضالریله دولتمزک ایرادندن سنوی براز ایراد افراز ایدوب یا نقداً و یا اشیا اولوق اوزره تدریجی ادا اولنق ایچون مخصوص بر ایلمچی دخی انتخاب ایدوب طرف دولت علیہ یہ ارسال ایدهرز دیو اولکون ختم کلام

اولنوب هرکس خانهنه داغیله جق ائنده باش وکیل تکرار خاطر آولامق فکریله معذور اوله ایلچی افندی سزی تصدیع ایتدک بومقوله مجلسلرده گاه ملایم و گاه سرت سویلنور . لطف ایدوب منبر الحاطر اولیه سز دیهرک ینه قویه دك تشییع ایدوب خانه مزه کلنک لکن بر ایکی کون صکره ملاحظه ایدهرک اگرچه بونلر لفظی بویه بر سوز سویلدیلر لکن بوکا اعتماد اولنمز ایاه تدارک ائسهک ملاحظه سنده ایکن بو کیفیتک قلمه کلوب و قرال مهریله مهور برتمک صورتلور برشی اولسی مناسب کورلکله تکرار بر مکاله دخی ترتیب ایدوب بر قاج کوندن صوکره وارلدقده کچن مکاله ده اولان مذاکراتک تمک صورتلو بر قلمه آلوب قرال مهریله مهرلنسی تکلیف اولنغله بر مقدار امتاعدن صکره راضی اولدیلر واقعا بر قاج کون صکره مکاله جوابنامه سی نامیله بر کاغذ مهرلیوب ارسال ائلملرکه چندان مطلوب مزه موافق اولمانغله قبولندن امتاع ایدوب مقصودمن دلخواه اوزره تصریح اولنماش قولز بویه دکل ایدی بو صحیح سکوت افاده اتمز دیدیکمزده قرال مهریله کلن جوابنامه یی قبول ائتمک قرالمزک عرضی محل بر معناده در لکن مناسب کورسه کز شمذیلک بوسزده قالسون و قرال ایله کوروشلده مکده مقصودیکیزی کندویه تفهیم ایدوب بر آخرین دخی طلب ایدرسکز دیدکلرنده واقعا پکده تکدیر مناسب کورلیوب قرال ایله مذاکره ایتک اوزره جواب نامه یی آلیقویبدق بر قاج کون صکره قرال ایله کوروشدیکمزده بر قائمه ترتیب ائتمشدک کیفیتکی کندویه تهریردن صکره قائمه یی و یروب اولدخی مشولزه موافق بر جوابنامه دخی ویرمک اوزره وعد ائتمکله ایکی کوندن صکره ایکنجی جوابنامه یی دخی قوللرینه ارسال ایلدکده بر مقدار متریح اولوب فیابعد معارضه سزجه کوروشمکه باشلدق و کون بکون محبتار زیاده اولغنه باشلاوب حرکتمز کونته کلنجه کرک قرال و کرک ساثر وکلا ایله صیغجه کوریشیلوب عظیم عرض محبت و دوستلق ایدرلر

ایلی حتی بر کون قرال ایله مصاحبت ائسانده ایلیچی افندی نیچون کیفک یوقدر غالباً سن بوشهرک حوادلرینه اعتماد ایدیورسک کی دیدی بوقوللری دخی انسان سرور و کدردن خالی اوله من لکن الحمد لله کیفمز کوزلدر دیدیم واقعا بغداد فکری کیجه و کوندوز درو نمزدن چیقما یوب خصوصاً بعض مکدر صدلر دخی استماع اولمشدی بوق بوشهرک حوادلرینه اعتماد ایتمه دیدیکم بیوده دکلدز زیرا مقولو عجم ایله یكدل اولمقدن نانی سزی وبزی تکدیر ایچون هر کون بر کونه دروغ (یا لان) ایجاد ایدوب شهره اشاعت ایدیورلر لکن هفته ده ایکی دفعه یعنی کون بزم دول سارده اولان ایلیچیلر بمزدن مکتوبلر من کلور فیابعد هر کلن مکتوبی سزه او قوسونلر دیو باش کاتبی چاغروب تیه ایلیدی حتی بیج (ویانه) ده اولان ایلیچیمزدن دونکی کون بر کاغد کلدی ایشته باق دیو کندو جیندن چیقاروب بر ترکیه بیلور آدم او قودی و قوللرینه تفهیم ایلیدیلر شویله تحریر ایلش که بودفمه بجه کلن حوادلر بودر که بغداد خلقنک توآر ایلیدیکی مرتبه تضییق اولدینی واقع اولیوب وطشردن مخصوص سرعکر تعینی ایله دولت علیه تک اهتیمی زیاده اولمغله امیددر که بغداد بر ضرر ترتب ایتمدیکندن غیری دشمنه ظفر بوله لر دیمش واقعا بو مکتوبی کوردکده نوعما قوللرینه تسلیت حاصل اولمغله مقرر اوله سز تمام دوستلغه لایق معامله ایله صداقت و خلوصکزی تصدیق ایلیدیکنر دیدم حتی بر قاچ کون صکره کیف ما اتفاق استابولدن بوقوللرینه بر مکتوب کلوب کرکوک حوالیننده بر مقدار ظفر واقع اولوب بر ازدشمن قتل اولدینی تحریر اولمغله بر کون مناسبت ایله بو خصوص قراله نقل اولندقدن تمام قولا ق طوتوب استماع ایلیدیکی کی همان شابقه سین چیقاروب یاغمه کلدی غزا کز مبارک اوله الله تعالی شوکتلو پادشاهکزی نیجه بویله نصرت ایله سرور ایدوب دشمنلرین سر نکون ایلیه دیدی چونکه قرال تبریک ایلیدی اولمجلسده بولتان کرک بیانچی ایلیچیلر و کرک سائر رجال دولتی برر برر کلوب تبریک نصرت

ایلبیلر مملکت اسوجده اوچ آی اون کون مقدازی مکث اولنوب ایشرمنز
 دخی چونکه بوقدرجه برتخت ضابطه به کیرمک ممکن اولدی آغتوس
 دخی قریب اولنغله بحر بالطقک منجمد اولمندن خوف اولنمغین حرکت
 سوداسنه دوشلمکه وداع ایچون ترتیب اولنان قرال دیواننه وارلدقه
 حرکتیز زیاده کندونک کوجنه کلدوکندن وبو قوللرینک مفارقتدن
 متأم اولدینین ایراد وشوکتلو کرامتو خلیفه اسلام افدیمز حضرتلرینه
 اولان خلوص وصدائق رکاب هایون شوکت مقرونه عرض واعلام اولنمین
 قات قات رجال ایله نامه سین تسلیم وعظیم حزن وملال اظهار ایدوب
 دوستلنی اونومه دیهرک مفارقتیز اتناسنده بو قوللری اکرچه احترام
 وخلصکزدن فوق الغایه ممنون وخنود اولدق چونکه مأموریمز ماده سنده
 تپی دست کیدیلور لکن بندخی امید ایدر مکه جواب نامه مصموتی
 خاطر دن چیقارمیوب وقتی کلدکده وعدیکنز اوزره حرکت ایلنه سز
 دیدیکده ایلبی افندی بو خصوصه مطمئن الحاطر اول مبلغ مرقوی
 اسوجلودن طلب ایچون سک وکیلکم لفظیله وسکاقراللق سوزیمی ویردم دیو
 ایله آرقه مزی صیقدی قوللری دخی اعتماد کلی حاصل ایدوب وجه مشروح
 اوزره مسروراً عودت وباش وکیلی ایله دخی وداع اولندقده اولدخی
 قرالک جوابلرخی تصدیق ایدوب یوندن اقدام عرض اولنان برقطعه
 تقریر بندیکده تفصیل اولدینی اوزره بعض ماده عرض والتماس ایتمکه
 اقتضای اوزره جوابی ویریلوب وداع وخانه مزه کلدکده قرال طرفدن
 هدیه اولق اوزره بیک آلتون ارسال ایلبیلر بوندن صکره مکث
 اولنمیوب همان برایی کون ایچنده احضار ایلدکلری ایکی قطعه یخت «باط»
 تعمیر اولنورسکز طوبلی صغیر قرال کبیرینه سوار اولوب باش وکیلدن
 ماعدا اکثر رجال دولتی مخصوص سفینه به کلوب برررز وداع وشوکتلو
 کرامتو خلیفه اسلام افدیمز حضرتلرینک اسوج دولتی ایله دوستلنی
 قطع بیورمیوب ایلبی ارسال بیوردقلرندن عظیم تشکر وثنال ایدوب

صفر اخیرک اون برنجی کونی متوکلاً علی اللہ طوب شلککری اولہرق
« لانسورت » بوغازینہ طوغری عزیزیت اولنوب برموافق هوا ایله ایرتسی
کون بوغازہ واریلوب انکینہ چیقلدی اسوج مملکتی اکثر طاشلق اولغله
چندان منبت اولیوب و آلتمش درجہ عرضندہ واقع اولغله هواسی غایت
شدت اوزرہ بارد و یازی بر آئی مقداری اولغله همان طقوز آئی قدر قیش
اولور حزرانک اون برنجی کونی دفعہ بر عظیم قار یاغوب نصف ساعتہ
برقاریش قدر اولدی لکن در عقب هوا کشادہ اولغله در حال مضمحل اولدی
لکن شہرک هواسی غایت صاغ اولغله علل و انتقام قلت اوزرہ اولوب
اکثر خلقی اقویان، اوزون بویلو و کوزل یوزلور اولوب سکان یاشندہ
زندہ آدمیری قتی چوق کورلکدر . استقہولم، کہ مقرر حکومت اسوجدر
لیمانی نوعاً استانبول لیمانہ مشابہ اولوب وشہرک اولری جملہ بریردہ
اولیوب بریرینہ یقین اوچ اوطہدن عبارتدر سوقاقلری طوغری و وسعتلی
وقالدریم دوشمنش لکن خانہ لری فرنگستاندہ اولان اولر کبی زیادہ
شہرتلی دکدر خلقی غریب دوست و بیانجی بہ اکر آمدن حظ ایدرلر .
میومسی قلت اوزرہ اولوب خصوصاً اوزوم وانار هیچ بولماز تازہ
اوزوم وانار کورمہ مش آدم قتی چوقدر حتی قرال طاتلی قاون و قرمزی
قارپور چکردکی استدی قوللری کوندرمک اوزرہ وعد ایلدم و آیین
بلدہ لری ایشز آدم ولایتلرنده طورہ میوب فقرا بہ دخی ایش بولملردر .
دکانلردہ آلیش و بریش اکثری عورتدر عسکرلری غایت مرتب و پاک
وجنک آوردر . الحالہ ہذہ عسکر خصوصنہ زیادہ اہتماملری واردر .
سواری و پیادہ قرق ایکی بیک بشیوز جنک اوکرتمش سلطانہ مالکدر .
جیہ خانہ طولو اولوب بش محلدہ جیہ خانہ لری واردر . استقہولمدہ اولان
جیہ خانہ طاقی ایله آلتمش بیک تفنک ایله اوتوز بیک چفت پشتو
اوطہلرہ بیغشلر بوقوللری معاینہ ایلدم سائر ادوات جنک دخی بوکا
کورہ جراح بساطلرینہ وارنجہ صندوقلرہ ترتیب اولتمش حاضردر .

ترسانه‌سی نوروجیا قریبنده واقع « قولس قرون » نام قلمده اولوب
 اگرچه بوقوللری کوردم لکن خلقدن و کندو و کلاسندن استماع
 اولدینی اوزره یکریمی قدر قالیون و یوز قدر چکدری سفینه‌لری وار
 ایمش لکن بش اون قدر چکدری کوردم بزم چکدریلریمز قدر
 بیوک و مکلف دکدر ، لکن پک قوی یایلشدر و بر قالیون
 قورمشلر تکمیل اولوق اوزره ایدی یتیش آلتی قطعه طوب چکر
 پک کوزل و قوی بنا اولمشدر . اسوجلو خلقنک صغیر و کبیری
 اطفال و نوانه وارنجه بالطبع موسقولویه دشمن اولوب شورته‌که
 بر آدم مسقولو حقنده ثنا ایلیه اول آنده اول آدمه دشمن اولورلر
 و جله‌سی دولت علیه دوستلق دعوانده اولوب بر صغیر اوشاق
 و برادنی خدمتکار کوروب شابقه‌نی چقاروب اکرام اوزره معامله
 ایدر ایدی واسوج خلقی دول نصارا یتنده جارت ایله مشهور اولوب
 برنی ثنا ایلدکرنده فلان آدم اسوج یورکلودر دیرلر ایمش حاصلی
 حرکتیزک آلتیجی کونی موافقت هوا ایله قبل‌الظهر « دانقه » لیمانه
 وصول میسر اولوب عظیم شلکلردن صوکره تهیه قلنان خانیه تزول
 و تدارک طریقمز کورولنجه‌یه دکین بش کون مکث ایدوب آلتیجی کون
 قره‌دن وارشوه طرفه عزیزیت و قطع منازلده سرعت اولنمغله اون
 ایکنجی کون وارشویه داخل اولنوب کیف مااتفق اوکون قرال
 متوفانک جدیدی آلا‌ی ایله چقاروب « قراقو » قلمنه ارسال ایتلریله
 خلق آلا‌یه مشغول اولوب چندان کمنه ایله کوروشلمدی لکن ایرتسی کون
 کرک قرال و کیلی اولان « بریماس » طرفدن و کرک ساراعیان تبریک قدومه
 کلوب تهنیت ایلدیلر چونکه وصولمز جمهورک قرال اتخابی مشاوره‌لری
 و قته مصادف اولنمغله اکثر لهلو طائفه‌سی وارشوده جمع اولش بولنمغله ناسک
 مزاحمه‌سی حددن افزون ایدی لهلو طائفه‌سی قرال اتخابی خصوصنده
 ایکی فرقه اولوب اکثری « استانسلاو » ی قرال طلب و برمقداری دخی که

آنلر « لتوانیہ » و « قراقوہ » ایالتلری اہالیسیدر مقولو طرفن طوتوب
آخرین مراد ایدرلرایدی بوقوللری جمیت مشاورہ نك دردنچی کونہ نك
مكث ایشیدیم بینلرنده غایت منازعه وار ایدی بو ائشاده دخی موسقولو
طرفدن اوتوز بیک قدر عسکر ایله برطابورک لهه کیدوب وار شوه
طرفه عنیمتلی شیوع بولمقله استانسلاوک طرف خلافتده اولنلر قوت
بولوب ایستانسلاویلر زیاده تلاشه دوشمشلر ایدی لکن ینہ غیرتی الدن
قومیوب موسقولو کیرمکه ینہ قادر اوله بیلور جملہ من قویجه سی ایدوب
بای حال ایستانسلاوی قرال ایدہرز دیرلرایدی حتی برکون انشای
مشاورہ ده موسقولو طرفنی طوتان لهلو اعیانندن لتوانیہ سرعسکری
اولان « برنس پشتووجکی » نام بر مقدار ایستانسلاوی خلافتہ سوز
سویلکه خلق اوزرینہ دال قلیج هجوم ایدوب هلاک ایتمک مراد ایلد کلرنده
بر تقریب ایله فرار ایدوب بوقوللری انده ایکن بشیوز قدر اتباع و اطرافیلہ
ولیس نہرینی قارشو کچمشدی کرک قرال وکیل و کرک باش وکیل « بونیا
توسکی » سرآ و علناً بوقوللرینہ تقرر و تفہیملری اوزرہ بای حال استانسلاوی
قرال ایتمک سی و ہمتلری خدا اعتدالی متجاوزدر اقتضا ایدر ایسہ
مقولو ایله جنک ایدہرز لکن بو حال دولت علیہ نك اعانت و مساعدہ منہ
محتاج در دیرلرایدی واسوجلو اوتہ دنبر و مترصد فرصت و لهلو ایله سوزلری دخی
اولمقله اگر جنک ظہور ایدر ایسہ انلر دخی « لیووزنیہ » طرفہ کچوب
مفوری اورہ جقلرنده اشتباہ یوقدر حاصل کلام کرک لتوانیہ و کرک
قراقویہ لهلولری استانسلاوک طرف خلافتده بولمقلر دلالت ایدر کہ
مقولو ایله لهلو بیتہ شقاق عظیم دوشہ فرانیچہ لو ایله نچہ چاسارینی
ضرب دست و دامیارقہ و پروسیا قرال لری حسن توسط ایله لهلو امورینہ
مداخلہ دن کفید ایتدرمشلر ایدی کرک لهلو کرک اسوجلونک تقویت
امورلرنده دخی فرانسزلرک مدخل عظیمی واردر حتی شور تہدہ کہ
بوقوللری اسوجده ایکن فرانیچہ قرالندن بر مکتوب کلوب مقولو ایله

جنكه حاضر اولك مصارفكز ايجون آقچي هامبورغ قلعهنه بوليچه
 حاضر در همان تداركده اوله سز ديمش ایدی لکن اسوجلو امور لر زنده
 متانی بر طائفه اولمله بو خصوصه عجله ايتيوب لهلونك عاقبت کاری نه به
 منجر اوله جنغه انتظار اوزره ايدیلر بو قوللری وار شوه دن حرکتمز
 اتانسنده باش وکیل اولان « ديمتار يونياتوسکی » ايله وداع مجلسزده
 وکیل مرقوم فصیح ترکی بیلوب وفي الاصل متوفی اسوج قرالنك
 ایلچیلیکی ايله دولت عليه ده چوق زمان مکث ايتش بر آدم اولوب
 و دانما دولت عليه نك طرفدارلنی دعواسن ايتمله دولت عليه نك
 کندويه واقع اولان نعمت سابقه سن ذکر ایدوب صد هزار تشکر
 و اظهار خلوصدن تشکره بو قوللرینه خطاب ایدوب الله امانتی افنديلرینك
 خاکپایلرینه یوز سوردکده فیما بعد کنفولره مقبولدن امنیت اولیوب
 و مقبولونك اقصای مرادلری آزاق و قریم اولمله برکون دفعه
 آزاغی محاصره ایتلری محتلدلر همان اول باول آزاق طرفه محافظ
 و تمسیر و ترمیم و ذخائر و جبه خانه خصوصه کرکی کبی کفایت
 مقداری اهتمام بیورسونلر دیدی بو قوللری وار شوه ده ایکن مقو
 ایلچیلری ايله کوروشوب و دوستانه معامله ايله عسکرلری لهه
 کیردینك سحتدن استفسار ایلدکده قطعا انکار ايتيوب بلی عسکرمن
 کیرمشدر اقتضا ایدرایه آردی کلک ايجون لهلو سنورینه قریب
 « سمونجکی » نام محله اوتوز بیک آدم و کذالك « کیف » قلعه سنده
 دخی اون بش بیک مقولو ايله یکرمی بش بیک قزاق عسکری حاضر
 و آماده در دیدی قوللری دخی فی مابعد وار شوه ده مکته جسارت
 ایده میوب اون کون ايجنده حرکت اولنوب اون ایکی کونده « خوتینه »
 و یکرمی کونده دخی استانه عليه به یوز سورمه ک میسر اولدینی معلوم
 دولتری بیورلدقه امر و فرمان افندیمز حضرتلرینکدر .